

7-27
IN S. CAMILLUM DE LELLIS

HYMNUS.

QUotquot supremo tempore
Dextro juvari Numine
Desideratis, supplices
Preces Camillo fundite.

Mollis juventae crimina
Moestis redemit imbribus;
Dolensque vera reddidit
Foetae parentis somnia.

Se namque totum sedulo
Ægris levandis tradidit,
Tergere sordes, ulcera
Curare, lectos sternere.

Quin mortis in discrimine
Ut ferret unus omnibus
Opem periclitantibus,
Lecto praevit Coetui.

Quot arma, quotque praelia
Coeco furore percitus
Imis ab Orci sedibus
Immanis Hostis impulit!

Sed ille Christum tendere
Avulsa ligno brachia,
Sibi, statimque Tartari
Eversa vidit agmina.

Illum labor nec improbus,
Nec pestis unquam terruit,
Quam dente saevo tabida
Depasceretur corpora.

Hinc visus est fungentibus
Sacro pioque munere
Plerumque verba subdere
Coelestis Aulae Nuncius.

Hinc & futura pandere,
Et nosse cordis abdita,
Legesque rebus insitas
Datum Camillo vertere.

Laboriosum denique
Cursum peregit firmiter,
Et clara longe clarior
Praetervolavit sidera.

Et nunc Beatus impetrat,
In maximo luctantibus
Agone, nobis vincere,
Palmamque ferre gloriae:

Deo Patri cum Filio
Et Spiritu Paraclito
Sit laus simul per omnia
Æternitatis saecula.

ANTIPHONA.

Hic vir despiciens mundum & terrena, triumphans, Divitias coelo
condidit ore, manu.

V. Justum deduxit Dominus per vias rectas.

R. Et ostendit illi regnum Dei.

ORATIO.

DEUS, qui Sanctum Camillum ad animarum in extremo agone lu-
ctantium subsidium singulari Charitatis praerogativa decorasti: ejus, quae-
sumus, meritis, Spiritum nobis tuae dilectionis infunde, ut in hora exi-
tus nostri hostem vincere, & ad coelestem mereamur Coronam perve-
nire. Per Christum Dominum nostrum. Amen.

L' Eccellentissimo e Reverendissimo Monsignor Fra D. FERDINANDO MATTEI Arcive-
scovo di Rodi, e Vescovo di Malta, concede quaranta giorni d'Indulgenza a chiunque
reciterà devotamente il suddetto Inno in onore di S. CAMILLO, che si venera nella Veneranda
Chiesa di S. Giacomo Appostolo, della quale ne hanno cura i Reverendi Sacerdoti che assistono
a ben morire.